

## 唐·杜甫、王维 五言律诗各 36 首

### 春望

国破山河在，城春草木深。  
感时花溅泪，恨别鸟惊心。  
烽火连三月，家书抵万金。  
白头搔更短，浑欲不胜簪。

### 春夜喜雨

好雨知时节，当春乃发生。  
随风潜入夜，润物细无声。  
野径云俱黑，江船火独明。  
晓看红湿处，花重锦官城。

### 旅夜抒怀

细草微风岸，危樯独夜舟。  
星垂平野阔，月涌大江流。  
名岂文章著，官应老病休。  
飘飘何所似，天地一沙鸥。

### 登岳阳楼

昔闻洞庭水，今上岳阳楼。  
吴楚东南坼，乾坤日夜浮。  
亲朋无一字，老病有孤舟。  
戎马关山北，凭轩涕泗流。

### 瞿塘怀古

西南万壑注，劲敌两岸开。  
地与山根裂，江从月窟来。  
削成当白帝，空曲隐阳台。  
疏凿功虽美，陶钧力大哉。

### 山居秋暝

空山新雨后，天气晚来秋。  
明月松间照，清泉石上流。  
竹喧归浣女，莲动下渔舟。  
随意春芳歇，王孙自可留。

### 送梓州李使君

万壑树参天，千山响杜鹃。  
山中一夜雨，树杪百重泉。  
汉女输橦布，巴人讼芋田。  
文翁翻教授，不敢倚先贤。

### 汉江临眺

楚塞三湘接，荆门九派通。  
江流天地外，山色有无中。  
郡邑浮前浦，波澜动远空。  
襄阳好风日，留醉与山翁。

### 送邢桂州

铙吹喧京口，风波下洞庭。  
赭圻将赤岸，击汰复扬舲。  
日落江湖白，潮来天地青。  
明珠归合浦，应逐使臣星。

### 使至塞上

单车欲问边，属国过居延。  
征蓬出汉塞，归雁入胡天。  
大漠孤烟直，长河落日圆。  
萧关逢侯骑，都护在燕然。

## 江汉

江汉思归客，乾坤一腐儒。  
片云天共远，永夜月同孤。  
落日心犹壮，秋风病欲苏。  
古来存老马，不必取长途。

## 禹庙

禹庙空山里，秋风落日斜。  
荒庭垂桔柚，古屋画龙蛇。  
云气嘘青壁，江声走白沙。  
早知乘四载，疏凿控三巴。

## 秦州杂诗（其七）

莽莽万重山，孤城山谷间。  
无风云出塞，不夜月临关。  
属国归何晚，楼兰斩未还。  
烟尘一帐望，衰飒正摧颜。

## 秦州杂诗（其十五）

未暇泛沧海，悠悠兵马间。  
塞门风落木，客舍雨连山。  
阮籍行多兴，庞公隐不还。  
东柯遂疏懒，休镊鬓毛斑。

## 月夜忆舍弟

戍鼓断人行，边秋一雁声。  
露从今夜白，月是故乡明。  
有弟皆分散，无家问死生。  
寄书长不达，况及未休兵。

## 观猎

风劲角弓鸣，将军猎渭城。  
草枯鹰眼疾，雪尽马蹄轻。  
忽过新丰市，还归细柳营。  
回看射雕处，千里暮云平。

## 送赵都督赴代州得青字

天官动将星，汉地柳条青。  
万里鸣刁斗，三军出井陘。  
忘身辞凤阙，报国取龙庭。  
岂学书生辈，窗间老一经。

## 过刘司直赴安西

绝域阳关道，胡烟与塞尘。  
三春时有雁，万里少行人。  
苜蓿随天马，蒲桃逐汉臣。  
当令外国惧，不敢觅和亲。

## 送张判官赴河西

单车曾出塞，报国敢邀勋。  
见逐张征虏，今思霍冠军。  
沙平连白云，蓬卷入黄云。  
慷慨倚长剑，高歌一送君。

## 送平淡然判官

不识阳关路，新从定远侯。  
黄云断春色，画角起边愁。  
瀚海经年别，交河出塞流。  
须令外国使，知饮月支头。

### 月夜

今夜鄜州月，闺中只独看。  
遥怜小儿女，未解忆长安。  
香雾云鬟湿，清辉玉臂寒。  
何时倚虚幌，双照泪痕干？

### 春日忆李白

白也诗无敌，飘然思不群。  
清新庾开府，俊逸鲍参军。  
渭北春天树，江东日暮云。  
何时一樽酒，重与细论文。

### 天末怀李白

凉风起天末，君子意如何。  
鸿雁几时到，江湖秋水多。  
文章憎命达，魑魅喜人过。  
应共冤魂语，投诗赠汨罗。

### 不见

不见李生久，佯狂真可哀。  
世人皆欲杀，吾意独怜才。  
敏捷诗千首，飘零酒一杯。  
匡山读书处，头白好归来。

### 对雪

战哭多新鬼，愁吟独老翁。  
乱云低薄暮，急雪舞回风。  
瓢弃尊无绿，炉存火似红。  
数州消息断，愁坐正书空。

### 送宇文三赴河西充行军司马

横吹杂繁笳，边风卷塞沙。  
还闻田司马，更逐李轻车。  
蒲类成秦地，莎车属汉家。  
当令犬戎国，朝聘学昆邪。

### 香积寺

不知香积寺，数里入云峰。  
古木无人径，深山何处钟。  
泉声咽危石，日色冷青松。  
薄暮空潭曲，安禅制毒龙。

### 登辨觉寺

竹径从初地，莲峰出化城。  
窗中三楚尽，林上九江平。  
软草承趺坐，长松响梵声。  
空居法云外，观世得无生。

### 终南山

太乙近天都，连山到海隅。  
白云回望合，青霭入看无。  
分野中峰变，阴晴众壑殊。  
欲投人处宿，隔水问樵夫。

### 终南别业

中岁颇好道，晚家南山陲。  
兴来每独往，胜事空自知。  
行到水穷处，坐看云起时。  
偶然值林叟，谈笑无还期。

### 日暮

牛羊下来久，各已闭柴门。  
风月自清夜，江山非故园。  
石泉流暗壁，草露滴秋根。  
头白灯明里，何须花烬繁。

### 为农

锦里烟尘外，江村八九家。  
圆荷浮小叶，细麦落轻花。  
卜宅从兹老，为农去国赊。  
远惭句漏令，不得问丹砂。

### 琴台

茂陵多病后，尚爱卓文君。  
酒肆人间世，琴台日暮云。  
野花留宝靥，蔓草见罗裙。  
归凤求凰意，寥寥不复闻。

### 水槛遣心（其一）

去郭轩楹敞，无村眺望赊。  
澄江平少岸，幽树晚多花。  
细雨鱼儿出，微风燕子斜。  
城中十万户，此地两三家。

### 江亭

坦腹江亭暖，长吟野望时。  
水流心不竞，云在意俱迟。  
寂寂春将晚，欣欣物自私。  
江东犹苦战，回首一颦眉。

### 冬晚对雪忆胡居士家

寒更传晓箭，清镜览衰颜。  
隔牖风惊竹，开门雪满山。  
洒空深巷静，积素广庭闲。  
借问袁安舍，翛然尚闭关。

### 山居即事

寂寞掩柴扉，苍茫对落晖。  
鹤巢松树遍，人访荜门稀。  
绿竹含新粉，红莲落故衣。  
渡头烟火起，处处采菱归。

### 辋川闲居赠裴秀才迪

寒山转苍翠，秋水日潺湲。  
倚杖柴门外，临风听暮蝉。  
渡头余落日，墟里上孤烟。  
复值接舆醉，狂歌五柳前。

### 登裴秀才迪小台

端居不出户，满目望云山。  
落日鸟边下，秋原人外闲。  
遥知远林际，不见此檐间。  
好客多乘月，应门莫上关。

### 酬张少府

晚年惟好静，万事不关心。  
自顾无长策，空知返旧林。  
松风吹解带，山月照弹琴。  
君问穷通理，渔歌入浦深。

### 游修觉寺

野寺江天豁，山扉花竹幽。  
诗应有神助，吾得及春游。  
径石相萦带，川云自去留。  
禅枝宿众鸟，漂转暮归愁。

### 后游

寺忆曾游处，桥怜再渡时。  
江山如有待，花柳更无私。  
野润烟光薄，沙暄日色迟。  
客愁全为减，舍此复何之？

### 客亭

秋窗犹曙色，落木更天风。  
日出寒山外，江流宿雾中。  
圣朝无弃物，老病已成翁。  
多少残生事，飘零似转蓬。

### 怀锦水居止（其二）

万里桥西宅，百花潭北庄。  
层轩皆面水，老树饱经霜。  
雪岭界天白，锦城曛日黄。  
惜哉形胜地，回首一茫茫！

### 夜宴左氏庄

风林纤月落，衣露净琴张。  
暗水流花径，春星带草堂。  
检书烧烛短，看剑引杯长。  
诗罢闻吴咏，扁舟意不忘。

### 归嵩山作

清川带长薄，车马去闲闲。  
流水如有意，暮禽相与还。  
荒城临古渡，落日满秋山。  
迢递嵩高下，归来且闭关。

### 归辋川作

谷口疏钟动，渔樵稍欲稀。  
悠然远山暮，独向白云归。  
菱蔓弱难定，杨花轻易飞。  
东皋春草色，惆怅掩柴扉。

### 春中田园作

屋上春鸠鸣，村边杏花白。  
持斧伐远扬，荷锄觐泉脉。  
归燕识故巢，旧人看新历。  
临觴忽不御，惆怅远行客。

### 新晴野望

新晴原野旷，极目无氛垢。  
郭门临渡头，村树连溪口。  
白水明田外，碧峰出山后。  
农月无闲人，倾家事南亩。

### 春园即事

宿雨乘轻屐，春寒著弊袍。  
开畦分白水，间柳发红桃。  
草际成棋局，林端举桔槔。  
还持鹿皮几，日暮隐蓬蒿。

### 房兵曹胡马

胡马大宛名，锋棱瘦骨成。  
竹批双耳峻，风入四蹄轻。  
所向无空阔，真堪托死生。  
骁腾有如此，万里可横行。

### 鹰

素练风霜起，苍鹰画作殊。  
奴身思狡兔，侧目似愁胡。  
绦镞光堪摘，轩楹势可呼。  
何当击凡鸟，毛血洒平芜。

### 长江（其一）

众水会涪万，瞿塘争一门。  
朝宗人共挹，盗贼尔谁尊。  
孤石隐如马，高萝垂饮猿。  
归心异波浪，何事即飞翻。

### 有感五首（其三）

洛下舟车入，天中贡赋均。  
日闻红粟腐，寒待翠华春。  
莫取金汤固，长令宇宙新。  
不过行俭德，盗贼本王臣。

### 别房太尉墓

他乡复行役，驻马别孤坟。  
近泪无干土，低空有断云。  
对棋陪谢傅，把剑觅徐君。  
唯见林花落，莺啼送客闻。

### 送丘为落第归江东

怜君不得意，况复柳条春。  
为客黄金尽，还家白发新。  
五湖三亩宅，万里一归人。  
知祢不能荐，羞为献纳臣。

### 淇上送赵仙舟

相逢方一笑，相送还成泣。  
祖帐已伤离，荒城复愁入。  
天寒远山净，日暮长河急。  
解缆君已遥，望君犹伫立。

### 送崔兴宗

已恨亲皆远，谁怜友复稀。  
君王未西顾，游宦尽东归。  
塞迥山河净，天长云树微。  
方同菊花节，相待洛阳扉。

### 送杨长史赴果州

褒斜不容幘，之子去何之。  
鸟道一千里，猿声十二时。  
官桥祭酒客，山木女郎祠。  
别后同明月，君应听子规。

### 秋夜独坐

独坐悲双鬓，空堂欲二更。  
雨中山果落，灯下草虫鸣。  
白发终难变，黄金不可成。  
欲知除老病，唯有学无生。

### 春宿左省

花隐掖垣暮，啾啾栖鸟过。  
星临万户动，月傍九霄多。  
不寝听金钥，因风想玉珂。  
明朝有封事，数问夜如何？

### 孤雁

孤雁不饮啄，飞鸣声念群。  
谁怜一片影，相失万重云？  
望尽似犹见，哀多如更闻。  
野鸦无意绪，鸣噪自纷纷。

### 南征

春岸桃花水，云帆枫树林。  
偷生长避地，适远更沾襟。  
老病南征日，君恩北望心。  
百年歌自苦，未见有知音。

### 发潭州

夜醉长沙酒，晓行湘水春。  
岸花飞送客，樯燕语留人。  
贾傅才未有，褚公书绝伦。  
名高前后事，回首一伤神。

### 寄李十二白二十韵

昔年有狂客，号尔谪仙人。  
笔落惊风雨，诗成泣鬼神。  
声名从此大，汨没一朝伸。  
文采承殊渥，流传必绝伦。  
龙舟移棹晚，兽锦夺袍新。  
白日来深殿，青云满后尘。

### 过秦皇墓

古墓成苍岭，幽宫象紫台。  
星辰七曜隔，河汉九泉开。  
有海人宁渡，无春雁不回。  
更闻松韵切，疑是大夫哀。

### 杂诗

双燕初命子，五桃新作花。  
王昌是东舍，宋玉次西家。  
小小能织绮，时时出浣纱。  
亲劳使君问，南陌驻香车。

### 晚春闺思

新妆可怜色，落日卷罗帷。  
炉气清珍簟，墙阴上玉墀。  
春虫飞网户，暮雀隐花枝。  
向晚多愁思，闲窗桃李时。

### 登河北城楼作

井邑傅岩上，客亭云雾间。  
高城眺落日，极浦映苍山。  
岸火孤舟宿，渔家夕鸟还。  
寂寥天地暮，心与广川闲。

### 送秘书晁监还日本国

积水不可极，安知沧海东。  
九州何处远，万里若乘空。  
向国唯看日，归帆但信风。  
鳌身映天黑，鱼眼射波红。  
乡树扶桑外，主人孤岛中。  
别离方异域，音信若为通。

乞归优诏许，遇我宿心亲。  
未负幽栖志，兼全宠辱身。  
剧谈怜野逸，嗜酒见天真。  
醉舞梁园夜，行歌泗水春。  
才高心不展，道屈善无邻。  
处士祢衡俊，诸生原宪贫。

稻粱求未足，蕙苳谤何频。  
五岭炎蒸地，三危放逐臣。  
几年遭鵬鸟，独泣向麒麟。  
苏武先还汉，黄公岂事秦。  
楚筵辞醴日，梁狱上书辰。  
已用当时法，谁将此义陈。

老吟秋月下，病起暮江滨。  
莫怪恩波隔，乘槎与问津。

### 偶题

文章千古事，得失寸心知。  
作者皆殊列，名声岂浪垂。  
骚人嗟不见，汉道盛于斯。  
前辈飞腾入，馀波绮丽为。  
后贤兼旧列，历代各清规。  
法自儒家有，心从弱岁疲。  
永怀江左逸，多病邺中奇。

騶骥皆良马，骐驎带好儿。  
车轮徒已斫，堂构惜仍亏。  
漫作潜夫论，虚传幼妇碑。  
缘情慰漂荡，抱疾屡迁移。  
经济惭长策，飞栖假一枝。  
尘沙傍蜂蛰，江峡绕蛟螭。

萧瑟唐虞远，联翩楚汉危。  
圣朝兼盗贼，异俗更喧卑。  
郁郁星辰剑，苍苍云雨池。  
两都开幕府，万宇插军麾。  
南海残铜柱，东风避月支。

### 晓行巴峡

际晓投巴峡，馀春忆帝京。  
晴江一女浣，朝日众鸡鸣。  
水国舟中市，山桥树杪行。  
登高万井出，眺迥二流明。  
人作殊方语，莺为故国声。  
赖多山水趣，稍解别离情。



音书恨乌鹊，号怒怪熊罴。  
稼穡分诗兴，柴荆学土宜。  
故山迷白阁，秋水隐黄陂。  
不敢要佳句，愁来赋别离。